



100 onns
Lia Rumantscha

Cuira, ils 26 d'october 2019

Communicaziun a las medias

Exact 100 onns suenter la fundaziun

Radunanza da delegadas e delegads da la Lia Rumantscha a Cuira

Sonda, ils 26 d'october 2019, ha già lieu a Cuira la radunanza da delegadas e delegads da la Lia Rumantscha (LR) sut il presidi da Johannes Flury – sin il di exact 100 onns suenter la fundaziun. En il center èn stadas la finiziun dal giubileum da 100 onns e la terminaziun uffiziala dal project «Medias rumantschas». Ulteriurs temas èn stads la nova strategia da la LR ed ils proxims pass en il champ da la digitalisaziun.

Sonda, ils 26 d'october 2019 èn 52 delegadas e delegads sco era giasts d'onur e personas interessadas stads preschents a la radunanza da la LR a Cuira. Ella ha già lieu en preschientscha da Jon Domenic Parolini, president da la regenza dal chantun Grischun, e Guido Decurtins, represchentant dal parlament da la citad da Cuira.


Rapport «100 onns Lia Rumantscha»

Sin il di exact in tschientaner suenter sia fundaziun ha la LR concludì uffizialmain las festivtads da giubileum a la radunanza. L'organisaziun giuditgescha il festival «100 onns Lia Rumantscha» che ha già lieu dal 1. fin ils 18 d'avust 2019 a Zuoz sco bain gartegià. Radund 5'000 Rumantschas e Rumantschs sco era personas interessadas d'autras cuminanzas linguisticas han visità il teater da giubileum «Tredeschin Retg» ed ils indesch dis tematics cun passa 80 puncts da program. La LR ha plaschair dal grond interess e dals blers resuns positivs. Il Plazzet da Zuoz è sa transformà durant il festival en in lieu d'inscunter e da barat. Grazia a la grondezza dal festival èsi reussì da sensibilisar tut las parts dal pajais per las particularitads e las sfidas en connex cun il rumantsch. Quai mussa il grond resun medial cun pli che 200 artitgels da gassetta en l'entira Svizra. Era sur ils cunfins naziunals è vegnì rapportà da las festivtads.

Sonda è vegnì preschentà a las delegadas ed als delegads il rapport final provisoric cun il rendaint. L'emprim budget da CHF 975'000 è vegnì augmentà sin CHF 1'209'000 suenter l'elavuraziun dal project da detagl. Il quint final serra cun expensas totalas da CHF 1'317'000. Radund CHF 675'000 vegnan da contribuziuns dal maun public e da fundaziuns sco era da sponsoring e da contribuziuns da faaturas e fauteurs.

Terminaziun dal project «Medias rumantschas»

La LR ha suenter bundant dus onns concludì uffizialmain il project «Medias rumantschas» che ha fatschentà ella dapi la stad 2017. A la radunanza da delegadas e delegads ha la LR preschentà il rendaint final. Il project ch'è vegnì finanzià comunablamain da la Confederaziun, dal chantun Grischun e da la LR ha chaschunà expensas da radund CHF 650'000. Suenter la fundaziun da la Fundaziun Medias Rumantschas (FMR) è la lavur da la LR terminada. Il fanadur 2019 ha il cussegl da fundaziun sut il presidi da l'anteriura chanceliera federala Corina Casanova surprindì il timun. Il november 2019 surpiglia il schefredactor nov elegì David Truttmann l'uffizi.



100 onns
Lia Rumantscha

Elecziun

La radunanza da delegadas e delegads da LR ha elegì unanimamain Romedi Conradin da l'Uniun dals Grischs sco suppleant da la suprastanza da la LR. El succeda ad Anna Chatrina Brunold che ha declerà sia demissiun.

Nova strategia e digitalisaziun

Sin basa dal rapport dal Center per democrazia ad Aarau e sin las constataziuns durant las festivitads da 100 onns è la LR per il mument vidlonder dad elavurar ina nova strategia. La suprastanza da la LR ha instradà ina grupp da lavur che sa cumpona da represchentantas e represchentants dal cussegl da la LR e da l'operativa da la LR. Ella prepara ina proposta per mauns da la radunanza da delegadas e delegads. L'approvaziun ha lieu en ina radunanza extraordinaria la primavaira 2020.

In ulteriur tema da la radunanza da delegadas e delegads da la LR è stà la digitalisaziun. La LR elavura per il mument cun differentas partidas che s'engaschan sin quest champ in fundament per ils projects existents. Sco impurtant giuditgescha ella ch'ìls meds ch'il chantun Grischun metta a disposiziun per la digitalisaziun vegnian era impundì per la digitalisaziun en ils secturs lingua e cultura.